

REGLUGERÐ

um stuðning Framleiðnisjóðs landbúnaðarins við nýjar búgreinar, búháttabreytingar og aðra nýbreytni í landbúnaði.

1. gr.

Merking orða er í reglugerð þessari sem hér segir:

Búmark er viðmiðunartala afurðaeininga hjá einstökum framleiðanda búvöru, sem ákveðin er skv. reglum, settum með heimild í lögum nr. 46 27. júní 1985.

Fullvirðisréttur er það magn mjólkur og sauðfjárafurða, sem framleiðendum er ábyrgst fullt verð fyrir á grundvelli samnings skv. a-lið 30. gr. 1. nr. 46/1985.

Ærgildi er bústofnseining. Vetrarfóðruð sauðkind telst 1 ærgildi, kýr telur 20 ærgildi, keflid kvíga 12, vetrungur 8 og kálfur 4 ærgildi.

Ærgildisafurð er afurðaeining. Ein ærgildisafurð telst vera 16,8 kg af dillakjöti og tilsvarendi verðmæti í kjöti af fullorðnu fé, eða 174 lítrar af mjólk, eða 20 kg af nautakjöti.

Lögbýli er skilgreint með sama hætti og í 1. gr. ábúðarlaga nr. 64 31. maí 1976 með síðari breytingum.

Verðlagsár er tímabilið frá 1. september til 31. ágúst árið eftir.

2. gr.

Framleiðnisjóður landbúnaðarins ráðstafar eftirgreindu fé til viðfangsefna í landbúnaði:

- a) fé sem ríkissjóður leggur fram til þess að mæta áhrifum samdráttar í framleiðslu mjólkur og sauðfjárafurða, sbr. 37. gr. 1. nr. 46 27. júní 1985,
- b) tekjum af hinu sérstaka fóðurgjaldi, sbr. 2. mgr. 34. gr. 1. nr. 46 27. júní 1985.

3. gr.

Fé skv. a—lið 2. gr. er stjórn Framleiðnisjóðs heimilt að ráðstafa sem framlögum til þeirra er breyta um búskaparhætti á lögbýlum á árunum 1986-1990. Um eftirfarandi framlög er að ræða:

- a. til þeirra sem fella niður eða draga úr framleiðslu mjólkur og/eða sauðfjárafurða til sölu á almennum markaði, með sölu á fullvirðisrétti. Heimilt er að greiða sérstakt álag vegna kaupa á fullvirðisrétti framleiðanda sauðfjárafurða, ef um er að ræða svæðisbundna fækkun t. d. vegna skógræktar, landfríðunar o. þ. l. Jafnframt er heimilt að greiða álag, þegar seldur er allur fullvirðisréttur í búgrein sem gefur minna en 20% af brúttótekjum búans,
- b. til þeirra sem fella niður eða draga úr framleiðslu mjólkur og/eða sauðfjárafurða til sölu á almennum markaði, um tiltekinn tíma, með leigu á fullvirðisrétti,
- c. til kaupa eða leigu á fullvirðisrétti þeirra framleiðenda, sem skera niður bústofn sinn vegna riðuveiki,
- d. til greiðslu afurða, sem falla til við bústofnsbreytingar vegna samdráttar í búrekstri og svara til þess fullvirðisréttar sem er keyptur eða leigður, með samningum skv. liðum a — c.
- e. til þeirra sem taka upp á lögbýlum annan atvinnurekstur en mjólkur- og kjötfra-
leiðslu.

Fyrir framlögum skv. e-lið skulu þeir að öðru jöfnu sitja, sem breyta búvöruframleiðslu sinni skv. a — c liðum þessarar greinar eða eru frumbýlingar.

Framlög skv. a — c liðum skulu vera tilteknar upphæðir á hvert ærgildi fullvirðisréttar, sem viðkomandi framleiðandi afsalar sér.

Með umsókn um framlag skv. e-lið þessarar greinar skal umsækjandi leggja fram stofn- og rekstraráætlun um fyrirhugaðan atvinnurekstur á býlinu. Áætlanir skulu staðfestar af héraðsráðunaut, eða öðrum þeim aðila, sem stjórn Framleiðnisjóðs telur til þess hæfan.

Við sölu og/eða leigu fullvirðisréttar skal Framleiðsluráð landbúnaðarins breyta búmarksskrá í samræmi við gerða samninga.

Stjórn Framleiðnisjóðs er heimilt að draga frá framlögum aðra beina styrki og hvers konar önnur óafturkræf framlög, sem viðkomandi framleiðendur fá vegna búháttabreytinga.

Að fengnum tillögum Framleiðnisjóðs ákveður landbúnaðarráðherra hver upphæð framlags í hverjum flokki skv. 1. mgr. þessarar greinar skuli vera fyrir hvert verðlagsár. Framlög skulu vera verðtryggð skv. nánari ákvörðun landbúnaðarráðherra.

4. gr.

Stjórn Framleiðnisjóðs er heimilt að binda framlag vegna búháttabreytinga með kaupum eða leigu á fullvirðisrétti við 500 ærgildi að hámarki hjá einstökum framleiðanda.

Samningar skulu gerðir við þá bændur, sem hverfa að búháttabreytingu skv. reglugerð þessari, eftir reglum sem ráðherra setur.

5. gr.

Framleiðnisjóði er heimilt að skipta greiðslu fyrir keyptan fullvirðisrétt á sex ára tímabil frá undirritun samnings um búháttabreytingu.

Leiga fullvirðisréttar skal greidd árlega. Leigutími skal að lágmarki vera sex ár. Óski viðkomandi framleiðandi að nýta fullvirðisrétt sinn að leigutíma loknum, ber honum að tilkynna Framleiðnisjóði það, eigi síðar en tólf mánuðum áður en leigutíma lýkur.

Óski framleiðandi ekki eftir að nýta fullvirðisrétt sinn að loknum leigutíma, fellur fullvirðisréttur hans niður án bóta. Framleiðnisjóði er þó heimilt að greiða sérstakt álag á hvert ærgildi fullvirðisréttar sem þannig fellur niður.

6. gr.

Samningi um sölu eða leigu á fullvirðisrétti skal þinglýst sem kvöð á viðkomandi jörð.

7. gr.

Óski ábúandi á jörð, sem afsalað hefur fullvirðisrétti með samningi við Framleiðnisjóð, eftir að fá fullvirðisrétt að nýju að loknum samningstíma til að hefja framleiðslu mjólkur og/eða sauðfjárafurða, skal með það fara eins og um nýjan framleiðanda þessara afurða væri að ræða.

8. gr.

Staðfestingu á breytingum búmarks og fullvirðisréttar skal færa í búmarksskrá, sem haldin er í samræmi við VII. kafla l. nr. 46 27. júní 1985.

9. gr.

Um ráðstöfun annars fjár Framleiðnisjóðs en hér hefur verið talið sbr. 2. gr., gerir stjórn sjóðsins tillögur til landbúnaðarráðherra. Skal því varið til eflingar nýrra viðfangsefna í landbúnaði, stuðnings við búgreinar, markaðsöflunar og til fjárhagslegrar endurskipulagningar búreksturs á lögbýlum. Fyrirgreiðslu má veita í formi framlaga og lána.

10. gr.

Framleiðnisjóður birtir reikninga sjóðsins árlega í Stjórnartíðindum. Þar skal tekjum af hinu sérstaka fóðurgjaldi, sbr. b-lið 2. gr., og ráðstöfun þeirra haldið sérgreindum. Skal ríkisendurskoðun endurskoða þann hluta reikninga sjóðsins, auk lögboðinna endurskoðenda hans.

11. gr.

Brot á ákvæðum reglugerðar þessarar varða refsingu skv. 59. gr. laga nr. 46 27. júní 1985.

12. gr.

Reglugerð þessi, sem sett er samkvæmt heimild í lögum nr. 46 27. júní 1985 um framleiðslu, verðlagningu og sölu á búvörum, öðlast gildi þegar í stað. Jafnframt fellur úr gildi reglugerð nr. 370 11. október 1985.

Landbúnaðarráðuneytið, 25. september 1986.

Jón Helgason.

Jón Höskuldsson.

REGLUGERÐ**um breyting á reglugerð nr. 261/1983 um fæðingarorlof,
með síðari breytingum.**

1. gr.

Við 6. gr. bætist ný málsgrein er verði þriðja málsgrein og orðist svo:

Þegar sérstaklega stendur á vegna heilsufars barns er heimilt að fengnu vottorði læknis sem annast hefur barnið að konan taki hluta af fæðingarorlofi án þess að henni sé skylt að ljúka því í einu lagi. Hvert tímabil má þó ekki vera skemmra en einn mánuður.

2. gr.

Síðasta setning 13. gr. fellur brott.

3. gr.

3. mgr. 14. gr. orðist svo:

Hvort foreldri sem er getur að ósk móður dvalið hjá barni þennan mánuð.

4. gr.

15. gr. orðist svo:

Sé um fleirburafæðingu að ræða, greiðist fæðingarorlof einum mánuði lengur fyrir hvert barn umfram eitt.

5. gr.

16. gr. orðist svo:

Greiða skal fæðingarorlof í þrjá mánuði ef um er að ræða andvanaburð. Með andvanafæðingu er átt við meðgöngu í tuttugu og átta vikur eða lengri tíma, fósturþyngd 1000 gr eða meira og 35 cm lengd fósturs mælt frá hvirfli til ilja.

Sé um að ræða fósturlát eftir 20 vikna meðgöngu, greiðist fæðingarorlof í tvo mánuði.

6. gr.

Reglugerð þessi, sem sett er samkvæmt lögum nr. 97/1980, um breytingu á lögum um almannatryggingar nr. 67/1971, með síðari breytingum, öðlast þegar gildi.

Heilbrigðis- og tryggingamálaráðuneytið, 22. september 1986.

Ragnhildur Helgadóttir.

Ingimar Sigurðsson.